

Premiera da «Petta Pagada» a Vuorz

Il venderdis sera ha la gruppera «Petta Pagada» giu premiera el hotel Ucliva a Vuorz. Per l'emprema ga eis ella sepresentada publicamein. Cun atgnas cumposiziuns ha la formaziun fascinau il publicum. Ulteriurs concerts ein previ il proxim temps.

Hans Huonder/FMR

Laura Maria Schmed da Trun, *Dario Camenisch* da Pitasch, *Mauro Arpagaus* da Sagogn e *Severin Bonolini* da Castrisch fuormen la gruppera «Petta Pagada». Ella ei naschida spontanamein ord il duo Dario Camenisch e Mauro Arpagaus che fagevan gia musica ensem en in local a Pitasch. A moda semegliont spontana neschan era lur cumposiziuns. «Enzatgi da nus vegn cun in'idea ed aschia sedat ni sedat lu era buca in niev tetel», di Laura Maria Schmed.

Premiera egl Ucliva

Al concert el hotel Ucliva a Vuorz han ils quater musicians presentau pliras atgnas cumposiziuns romontschas. Schegie che la gruppera tscherca aunc la direcziun musicala, eis ella tonaton segira che quella vegn ad esser ella direcziun da rock. Culla premiera a Vuorz ei la band cuntenza. Rodund 40 persunas han visitau il concert: «Nus havein buca quintau cun tonta glieud. Tut ils plazs che nus havein mess a disposiziun ein stai occupai.» Negins arranschaments da questa stad hagi il hotel Ucliva a Vuorz giu tonta glieud. Quei bien success animescha lu era da canticuar. «Il proxim temps lessen nus dar ulteriurs concerts. Nus stuein denton mirar co las restricziuns sesviluppeschan», di la cantadura dalla gruppera.

Silla damonda, co els seigien vegni sil num dalla gruppera «Petta Pagada», di Laura Maria Schmed: «Nus havein giu differents numbs che fussen i aprau cun nus, denton essan nus la fin finala sedecidi per quel. Quei vul dir nuot auter che vendetga. Quei representa il meglier nossa band sco era nossas canzuns. Petta Pagada enviers nossa band ed enviers la societad.» En lur tocs tractan ils quater Sursilvans temas che sveglian sentiments era tier els sezs: «Igl ei temas actuals che vegnan tractai en discussiuns e debattas. Nus lein empruar da metter a cor quels a nos auditurs entras cantar surlunder.» Ils texts vegnan screts da Laura Maria e Dario. Che la premiera ha giu liug a Vuorz ha negin motiv special: «Nus eran alla tscherca d'in liug ed il hotel Ucliva haveva scret ora siu «openstage». Quei ei pia stau plitost ina casualitat.» Quella presentaziun hagi purschiu la caschun da far in'emprema emprova co ei seigi da cantar e sunar avon publicum. Per quei motiv hagien els sapientivamein buca vuliu far zatgei pli grond per l'entschatta.